

靜

志

居

詩

話

靜志居詩話卷二

秀水朱竹垞先生著

扶荔山房編輯

劉基字伯溫青田人元進士洪武初官至御史中丞論佐命功封誠意伯爲胡惟庸毒死正德中追諡文成有覆瓿集犁眉公集

樂府辭自唐以前詩人多擬之至宋而埽除殆盡元季楊廉夫李季和輩交相唱答然多構新題爲古體惟劉誠意銳意摹古所作特多遂開明三百年風氣其五言詩專仿韋左司要其神詣與相伯仲諸體均純正無疵

若二鬼一篇直欲破劉叉之膽矣公在元時有和王文  
明絕句云夜涼月白西湖水坐看三台上將星好事者  
遂傳會之謂公望西湖雲氣語坐客云後十年有帝者  
起吾當輔之此妄也當公羈管紹興時感憤至欲自殺  
藉門人密里沙抱持得不死明初既定婺州猶佐石抹  
宜孫拒守卽其酬和詩句如中夜登高樓遙瞻太微座  
衆星各參差威弧何時正鴻鴈西北來安能從之飛周  
發不恤緯楚放常懷闕却秦慕魯連存齊想田單蓋未  
嘗終食忘大都也是豈預自負身爲佐命者邪其題太

公釣渭圖云偶應飛熊兆尊爲帝者師則公自道也世人多以前知目公至凡緯讖堪輿若披肝露膽等書皆指爲公作豈其然乎

汪廣洋字朝宗高郵人洪武初爲中書左丞封忠勤伯拜右丞相尋貶廣東有詔數其罪自縊死有鳳池吟藁

忠勤詩饒清剛之氣一洗元人纖縹之態五言如平沙誰戲馬落日自登臺湖水當門落松雲傍枕浮懷人當永夜看月上疎桐對客開春酒當門墜落花天垂芳草

地漁唱夕陽村倒藤懸宿鳥絕壁挂晴霓暮雲生楚樹  
涼雨過邗溝碧樹藏蠻邏清歌發蜃舟江雲垂暝遠楚  
樹入秋多濁酒傳杯重烏絲界紙勻岸沙畱醉臥山鳥  
答行歌晴光生北固暮雨隔西津溼雲纏戍鼓高柳聚  
城鴉濁浪橫衝海斜陽半在船雲木深藏廟淮流直到  
門沙明宜見雪月上可行舟涼風吹雨過好鳥背人還  
春杯黃秫酒野飯碧芹羹欲往尋芝草因之采茯苓可  
入唐人主客圖靜居北郭猶當遜之毋論孟載也

孫炎字伯融句容人國初辟行省掾以省部事總

制處州會苗將叛被擒罵賊死追封丹陽縣男  
諡忠愍有左司集

伯融至正中與天台丁復同郡夏煜皆以詩名下筆百  
紙立盡謫處似李長吉質處似元次山在處時明祖命  
招致伯溫伯溫堅不肯出以寶劔遺伯融伯融作詩以  
爲劔當獻天子封還之伯溫無以答乃逡巡就見而李  
時遠詩統謂此劔左司家藏作歌以贈劉者誤也

鮑恂字仲孚崇德人元末薦授翰林不就洪武四  
年會試充考試官十五年詔徵耆儒入見命爲

文華殿大學士固辭放歸有西溪漫橐

湖州嘉興二志竝云仲孚與安吉余詮上海全思誠高  
郵張長年四人就徵考實錄入見歷三人其同徵一人  
未至乃登州張紳非思誠也又洪武四年會試仲孚以  
前貢士與翰林院侍讀學士詹同同文國子監司業  
瀛景濂吏部員外郎原本景道同充考試官是年主文  
官則禮部尙書陶凱中立前翰林院侍讀學士潘庭堅  
升聞也王元美別集所述未合

附錄周青士云西溪詩傳者絕少曩聞海鹽胡氏有

刊本求之不得嘗見其題畫詩云山橫紅葉晚寺鎖  
碧雲涼亦佳句也

宋訥字仲敏滑縣人元季官鹽山知縣國初徵爲  
國子助教升翰林院學士文淵閣大學士遷祭  
酒卒于官正德中追諡文恪有西隱橐

高季廸之文蘇平仲之表箋泐公之詩當時文字之禍  
烈矣然其間遺民諸集類不避諱當王師之人燕也若  
王原吉丁鶴年戴叔能陳敬初輩其詩指斥未易更僕  
數宋公身歷通顯其過元宮諸詩悲涼酸楚雖初明通



天之表子山江南之賦無以踰之他若華表柱頭相語  
鶴秣陵江上獨歸鴻半船涼色潮生海兩岸秋風浪拍  
沙縛蘆密覆低低屋把竹輕撐小小船野航招客買蓮  
子沙鳥驚人入荻花夕陽野飯烹魚釜秋水蒲帆賣蟹  
船斷壁野花迎客櫂壞牆津柳曬魚簪句亦自佳

詹同字同文初名書婺源人元末爲郴州路學正  
遇亂家黃州仕陳友諒爲翰林學士承旨歸附  
後賜今名授國子博士累官吏部尙書改翰林  
學士承旨諡文憲有天衢舒嘯

同文與吳濬仲樂致和宋景濂齊名號中朝四學士吳樂韻語寥寥宋亦非其本色於四子中遂爲翹楚

宋濂字景濂浦江人元末用薦除翰林編修以親老辭入仙華山爲道士國初徵至授皇太子經居禮賢館修元史充總裁官仕至翰林學士承旨兼太子贊善大夫正德中追諡文憲有潛溪翰苑芝園蘿山諸集

王子充敘景濂集云古今文章作者未易悉數卽婆而論南渡後有東萊呂氏說齊唐氏龍川陳氏各自成家

而香溪范氏所性時氏先後又間出近則浦陽柳公烏  
傷黃公竝時而作踵二公而起者爲吳正傳氏張子長  
氏吳立夫氏當呂氏唐氏陳氏之竝起也新安朱子弟  
子曰勉齋黃氏實以其學傳之北山何氏而魯齋王氏  
仁山金氏白雲許氏以次相傳胡仲申敘王子充集云  
吾婆以學術稱者至元中則金公吉甫胡公汲仲爲之  
倡汲仲之後則許公益之柳公道傳黃公晉卿吳公正  
傳胡公古愚卓立竝起而張公子長陳公君采王公叔  
善又皆彬彬附和於下言文獻之緒者以婆爲首稱合

兩公之言繹之金華文章理學之源備於是矣景濂於詩亦用全力爲之蓋心慕韓蘇而具體者

王禕字子充義烏人國初徵爲中書省掾詔修元史與宋濂同爲總裁官書成拜翰林待制奉使招吐蕃至蘭州召還改使雲南抗節死建文元年贈翰林學士謚文節正統中改謚忠文有華川玉堂二集

子充文脫去元人冗沓之病體製明潔當在景濂之右惟詩亦然

張以寧字志道古田人元末官翰林學士承旨明  
初例徙南京召爲侍讀學士三使安南道卒有  
翠屏前後集

承旨重峰送別一篇仿太白可稱合作李方伯楨題雙  
燕圖寄人詩云君家吟谿北我家郡北西君家梁間燕  
我家梁間棲周尙書枕送人詩云我家白沙渚君家桐  
江頭我家門前水亦向桐江流當皆從此出可知是作  
贈吳當時

劉三吾初名如孫字坦甫茶陵人元末提舉靖江

學洪武中用薦除左贊善升學士三十年主會  
試以多中南人坐罪戍邊永樂中卒有璫署春  
坊北園知非化鶴正氣等集桐江俞蓋知茶陵  
合爲坦坦齋集

學士元之故老其詩雖不中程足補庚申外史當張士  
誠在吳海運阻遏元主以御酒龍衣請之不得及蘇州  
旣平學士賦詩云姑蘇自王亦豪雄藩屏東南一旦空  
稷稻祇今誰阻遏海門元與直沽通又云吳中旣失無  
門戶海道長驅有舳艫蓋猶覬元之未亡其云廉藺同

心如結好蜀吳異地豈俱亡則有感羣雄之失策至云  
萬年圖籍來江表一曲琵琶度塞門斯與宋文恪過元  
故宮詩竝其悽切矣

魏觀初名已孫字杞山蒲圻人洪武初就徵授平  
江州學正遷國子助教歷兩浙都轉運使入爲  
起居注進太常卿翰林侍讀學士遷國子祭酒  
尋兩知蘇州府事坐法死有蒲山牧唱

明初循吏政教兼行稱蘇守魏公其脩府學則宋景濂  
記之舉鄉飲酒禮則王常宗述之乞言養老賓饌有儀

三代以後不多見也其五言古詩念切民瘼纏綿悱惻  
不減元道州近體亦清脫可誦當日高皇游觀上苑召  
與危素宋濂詹同吳琳同宴奉天門東紫閣謂曰前日  
送卿還今日與卿飲何其樂也命各賦詩紀之亦稱殊  
渥矣乃緣誣善之人一言坐以慘法甚矣君恩之不可  
恃也

吳伯宗名佑以字行金谿人洪武辛亥初開科帝  
親擢第一授禮部員外郎歷武英殿大學士尋  
降檢討有南宮使交成均玉堂四集



閣老首科狀頭自後江西人物繼起於是有狀元多吉  
水朝士半江西之諺予嘗購得是科會試錄就試者一  
百八十九人中式一百二十人浙江三十一江西二十  
七福建二十二山西一十三北平六河南廣東各五陝  
西四山東三廣西高麗各一直隸止二人考宋景濂會  
試錄稱先是京畿遵行鄉試中程式者七十二未及貢  
南宮上求治之切皆采用之蓋庚戌京畿所取士先會  
試而授之官矣

危素字太樸金谿人仕元至翰林學士承旨洪武

初授翰林侍講學士兼宏文館學士謫佃和州

有雲林詩集

太僕居大都鐘樓街明師入燕走報恩寺將入井僧大梓挽出之謂曰國史非公莫知公死是死國史也由是不死兵垂及史庫言於主帥輦而出之累朝實錄得無恙然元史成日曾未獲與筆削近 尙書亦以國

史自任乃絳雲樓一炬史彙盡亡將無兩公是非未必皆公故天有意阨之邪太僕說學齋文傳鈔都非足本雲林集係葛邏祿易之所編前有虞伯生送行序

劉崧字子高泰和人明初以人材舉授兵部職方  
司郎中遷北平按察司副使坐事輸作京師尋  
放還徵拜禮部侍郎署吏部尙書請老許之復  
召爲國子司業有槎翁集

子高句鏤字琢頗具苦心惜其體弱局於方程不能展  
摺於唐近大歷十子於宋類永嘉四靈於元最肖薩天  
錫

附錄劉仲修云子高日課一詩多至千餘篇遭亂崎  
嶇轉側二十餘年不爲少折旣貴澹然如布衣北平

去家五千里惟一僮侍側已復遣還晡時吏退獨處  
一室據几吟詠夜分不休其年愈老思愈壯詩愈工  
時豫章葛白大梁辛敬襄城楊士宏秣陵周湏鄭大  
同皆以歌詩自雄子高與之馳騁上下名聲相埒  
王元美云劉子高如雨中素馨雖復嫣然不作寒梅  
老樹風骨 胡元瑞云國初吳詩派昉高季廸越詩  
派昉劉伯溫閩詩派昉林子羽嶺南詩派昉孫仲衍  
江右詩派昉劉子高五家才力咸足雄據一方先驅  
當代第格不甚高體不甚大耳

黃肅字子邕江西新城人元季官禮部主事自北  
平來見命仍故官升侍郎已降郎中復升工部  
侍郎任尙書未幾出參政廣西坐黨禍死有醉  
夢稟

尙書匣鏡一篇當是懷故主遠在沙漠而作其云夫子  
新好合不能思故家則刺同時佐命之臣也

牛諒字士良東平人流寓吳興以秀才舉除翰林  
典簿使安南還擢工部員外郎歷禮部尙書降  
主事尋復任免有尙友齋集

尚書流寓吳興時過橋李與鮑恂仲孚邱民克莊張翼  
翔南王綸昌言聞人麟彥昭曹睿新民徐一夔大章尤  
存以仁及呂安坦來志道周棐常真釋智寬等集郭西  
景德寺攜酒賦詩其在南京則與唐肅處敬林公慶孟  
善陳世昌彥博徐一夔大章張翼翔南朱升允升會飲  
聯句及同張以寧志道使安南志道賦長句以贈有云  
更喜清詩慰遲暮蓋當日風雅之林每屈一指不徒以  
功名顯也又在元時中甲午大魁亦見志道詩句

楊訓文字克明潼川人元淮海書院山長遇亂居

靜志居詩話 卷二

士 扶荔山房

江都明初徵爲起居注兩遷左司郎中丙午年  
自太常卿知湖州移知汀州歷禮部尙書改戶  
部出爲河南行省參知政事卒

元詩華者易流於穢貫酸齎輩是也清者每失之弱薩  
天錫等是也明初若劉子高蘇平仲楊克明其源皆出  
於天錫質羸之恨諸公不免

滕毅字仲宏鎮江人以儒士徵授起居注擢吏部  
尙書出參政江西

尙書詩不多傳亦具風骨秋興二詩云西風如水灑絺

衣無數南來候鴈飛朔漠地寒收王氣岷峨秋盡斂餘  
暉三泉忽報金棺葬萬國同瞻玉璽歸相見不須談往  
事百年耆舊眼中稀虎戰龍爭二十秋江波日夜自東  
流道傍無語王孫泣天際含嚔帝子愁苜蓿風煙空壁  
壘黍葭霜露滿汀洲古來惟有西山月永夜依依照白  
頭彷彿宋文恪過故宮之作

吳雲字友雲宜興人洪武初授宏文館校書郎歷  
刑部尚書參政湖廣奉詔招諭雲南死之

尚書送李民瞻一律體格極似高季廸送沈左司詩而



聲色不同未免近於土木形骸矣錄之以諗知言之君子

嚴震直初名子敏字震直因御稱其字乃互易焉  
烏程人明初由糧長授河南布政司參議累官  
工部尙書致仕永樂初召令宣諭山西卒於澤  
州有遺興集

尙書山運糧萬石長舉爲布政司參議未之官畱署通  
政司事歷工部尙書洪武三十一年春致仕建文元年  
己卯復以年老辭不與事帝念其任事久畱住京師考

道與集中有讌集賜第之葵心堂詩乃是年三月十五日事分韻者爲董學士倫茹尚書瑞高太常遜志任尚書亨泰程都御史本立李尚書至剛鄭庶子濟黃侍郎福張尚書統高經歷德暘凡十有一人太常詩云偉哉尚書公致政鳴珂里賜第最幽敞迴出京塵裏庶子詩云尚書遂休致賜第居京洛侍郎詩云司空居廟堂憂國髻如絲挂冠神武門賜第畱京師歷歷可證而續藏書謂尚書歸老在里長陵以兩馬夾袋舁至京致身錄又稱靖難兵起時督餉山東皆妄也載攷文皇帝實錄

壬午七月二十三日詔云朕居藩邸凡百姓艱苦靡不知之數年來兵興北方之民疲勞尤甚朕所以舉義者爲宗社生民計今宗社旣安而北方之民未安朕夙夜不安乃命前工部尚書嚴震直戶部致仕尚書王鈞應天府府尹薛正言等分往山西山東陝西等布政司巡視民瘼何弊當革何利當建速具奏來尚書受詔往山西是秋九月十一日病卒於澤州公廨合之忠誠伯茹瑞所撰嚴公神道碑無異初不聞奉長陵密詔往雲南訪建文帝也吾學編遜國表忠紀等書不知何所據信

吞金爲實列尚書爲後死忠臣之首萬歷十九年巡按御史黃鍾疏請建祠榜曰旌忠列在祀典越數十年其裔孫祇字文昭作祠祀辨大指謂吾祖功業炳耀史冊何藉吞金一死以罔天下後世黃公欲顯吾祖適足以誣吾祖也噫文昭不欲誣其祖可謂賢子孫矣

韓宜可字伯時會稽人洪武初徵拜御史出爲山西布政謫雲南後起爲左副都御史

伯時詩見滄海遺珠句如松迷鶴徑渾無路花暗簫聲不見人青天有月來今夜白髮無家度幾秋芳草東風

沙上馬青山遲日柳邊鶯均有思致

蘇伯衡字平仲金華人明初仕爲國子學正擢翰林院編修宋濂以翰林承旨致仕薦以自代召至固辭賜文綺遣歸起教授處州以表箋忤旨坐罪卒于獄有平仲集

元時進賀表文觸忌諱者凡一百六十七字著之典章使人不可犯其法良善逮明孝陵恩威不測每因文字少不當意輒罪其臣若蘇平仲徐大章輩是也當日有事圜丘惡祝冊有予我字將譴撰文者桂正字彥良言於

帝曰予小子履湯用于郊我將我享武歌于廟以古率  
今未足深譴帝怒乃釋可謂善於悟主矣惜未有爲平  
仲調解者竟瘐死於獄悲夫一百六十七字者極盡歸  
化亡播晏徂哀奄昧駕遐仙死病苦沒泯滅凶禍傾頽  
毀偃仆壞破晦刑傷孤墜隳服布孝短天折災困危亂  
暴虐昏迷愚老邁改替敗廢寢殺絕思憂切患衰囚枉  
棄喪戾空陷厄艱忽除埽擯缺落典憲法奔崩摧殄隕  
墓槁出祭奠饗享鬼狂藏怪漸愁夢幻敝疾遷塵亢蒙  
隔離去辭追考板蕩荒古迺師剝革睽違尸叛散慘怨

尅反逆害戕殘偏枯眇靈幽沉埋挽升退換移暗了休  
罷覆弔斷收誅厭諱恤罪辜愆土別逝泉陵此延祐元  
年十一月取定擬至三年八月寬其禁矣其字樣雖難  
悉避然亦玉堂視草者所宜知也

唐肅字處敬會稽人元末官嘉興儒學正洪武初  
召修禮樂書擢應奉翰林文字兼國史院編修  
以疾失朝罷歸里謫佃濠卒有丹崖集

處敬文極爲危太樸宋景濂戴叔能申屠子迪所許詩  
與謝僉事原功齊名稱會稽二肅其爲學正也盡挈其

家居樵李徐幼文送以詩云路出三江外程淹一日間  
高季廸詩云舟重全家去詩多一路題處敬亦有留別  
詩存丹崖集中當元之季浙西歲有詩社而濮市濮仲  
溫豐於貲集一時名士爲聚桂文會以卷赴者五百人  
請楊廉夫評其優劣於是紀風土者目爲樂郊及楊完  
者亂州無完郭然繆同知思恭德謙猶招羣彥集南湖  
與會分韻者一十有四人越二年曹教授睿新民復集  
諸公於景德寺亦一十有四人是時聞人麟彥昭葉廣  
居居仲金綱子尚潘著澤民劉堪子興咸詩名吳鎮



靜志居詩話

卷二

六

扶荔山房

仲圭居魏塘貝瓊廷琚居千金圩鮑恂仲孚居郡城之  
西溪郁遵子路居商陳村四方避地者溫州陳秀民庶  
子居竹鄉巷閩人卓成大器之居甓川江陰孫作大雅  
居南湖崑山顧德輝仲瑛居合溪天台徐一夔大章居  
白苧里會稽江漢朝宗居濮院桐廬姚桐壽樂年居海  
鹽之峨溪而河南高遜志士敏東平牛諒士良江都邱  
民克莊錢唐陳世昌彥博建德張翊翔南皆來僑居四  
明周棐以陸宣公書院山長畱居梨林日以文酒唱酬  
詩成輒鏤板鐫壁間者傳爲勝事今也流風遺俗末有

存者錄處敬詩因附及之欲尋舊蹟不勝海桑岸谷之感也

韓守益字仲修石首人明初以儒士攝教宜都擢廣西按察僉事入爲河南道御史改春坊中允有樗壽橐

中允無詩名七言如幽禽曉聚岸花動錦鯉春肥溪水溫柳葉雨晴鸚鵡語木棉風暖鷓鴣飛隔簾花影散棠棣何處鳥聲啼栗畱具有風致

趙俶字本初紹興人元鄉貢進士明初官翰林待

制

永和續蘭亭會詩不見佳取其有晉人遺韻

桂彥良名德稱以字行慈溪人洪武初待詔公車  
以白衣賜宴除太子正字尋爲晉府右傳改長  
史追贈編修諡敬裕

長史以德望重韻語非其所長然如巴園五月收丹橘  
丙穴三春饌白魚亦小有風致吳江史明古爲作傳稱  
孝陵嘗咏科斗云池上看科斗分明古篆文命長史續  
之應聲曰惟因藏水底秦火不能焚可稱敏絕

王鏞嘉興人洪武庚戌舉人翰林院編修

子年十七避兵練浦歲己丑萑苻四起乃移家梅會里里在大彭嘉會二都之間市名王店或曰石晉時鎮遏使適居此故名或曰宋尙書居正之宅或曰元學士景家於是或曰元學正綸也傳聞各異己亥十月訪蔣布衣之翹於射襄城蔣語余曰子知王店之所由名乎洪武中孝廉鏞及弟鈞之所居也因出所輯樵李詩乘則二王詩俱在焉並出二王合刊詩藁舊本共一冊燈下讀未竟客至轟飲而罷甲辰四月再過之不值又數年

而蔣逝無子遺書盡失可歎也後見水竹居詩一卷中  
載二王題咏各一首因亟錄之水竹居者處士朱克恭  
之宅距語兒鄉東六十里地曰澄林當時郡人馬盛爲  
記貝瓊爲志題詩者二王而外有金天藻陳麟陳熊陳  
振孫詢熊詩云到門碧色帶初雨滿地綠陰遮暮天振  
詩云玉簫吹徹天如水釣艇歸來月滿村釣詩云候門  
童子低於鶴畱客軒窗小似船熊爲清江弟子見清江  
游爰山記詢府志有二人一分宜丞一汀州知府餘皆  
不得而詳矣梅會一作梅匯水曰梅溪鏞詩所云吾家

舊在梅溪上是也梁孟敬石門集有題嘉興王氏梅花  
莊詩未審卽是二王所居否因錄鏞詩附志於此

劉紹字子憲後以字行建昌新城人

明音類選  
作吉安人洪

武中官翰林應奉詩載元音遺響

子憲與盱江胡布子申張達季充爲郡人張烈光啓胡  
福元澤類編其詩號元音遺響度其初三人皆不仕于  
明者而府志載紹於洪武中官翰林應奉文字後以國  
子助教致仕則不得謂之元音矣登道山亭五言遺響  
不錄考子申詩序云僕與子憲爲世姻家曩俱客閩師

不克所志斯蓋客閩時作子申又爲紹作山居十詠其  
三曰仙臺山則在新城縣西南三十里而元澤編子憲  
詩題曰黎川劉紹然則紹非吉安人審矣

林公慶

松江新舊府志失書公字

字孟善處州人明初官翰林

出爲松江知府

孟善守松江葬三高士于山東麓見魏文靖集顧東  
江作府志官籍民閭皆闕焉不詳後來者更不足責矣  
趙訪字子常休寧人隱居東山元季輔元帥汪同  
起兵保鄉井授江南行樞密院都事丙申內附

洪武二年召修元史書成不願仕還有東山集  
東山環谷二先生俱以經學重尤研精春秋環谷守康  
侯之說東山學於黃楚望首闢夏時冠周月之非不相  
雷同故陳敬初贈詩云君之博洽漢馬融春秋三傳以  
例通百源雖異委則同二先生於吟詠均非所長趙差  
勝汪趙集歲久淪闕其裔孫吉士視權揚州鏤版以傳

陳基字敬初臨海人仕元爲經筵檢討歸值用兵  
開行樞密府起爲都事轉江浙行省郎中參張  
士信軍事尋參太尉府軍事遷學士院學士吳



平召修元史賜金而還有夷白齋橐

敬初家臨海丹邱之麓其在吳結小丹邱戴叔能爲作  
記其詩亦叔能所編顧仲瑛輯前後交友詩爲玉山雅  
集柯敬仲以下卽次以敬初詩謂同輩極力追之不及  
蓋當時之月旦然矣

胡翰字仲申一曰仲子金華人國初以薦授衢州  
教授召修元史成賜金帛遣歸有胡仲子集

明初浙東睦有徐舫詩派甌有趙次誠詩選越有求漁  
鍾秀集而金華承黃文獻潛柳文肅貫吳貞文萊諸公

之後多以古文辭鳴顧詩非所好以詩論吾必以仲申  
爲巨擘焉獨孤及之論曰五言之源生於國風廣於離  
騷著於蘇李盛於曹劉漢魏作者實有餘而文不足以  
今揆昔則有朱紘疎越太羹遺味之嘆誦仲申五言正  
猶路數出於土鼓篆籀生於鳥跡庶幾哉升堂之彥乎  
宜潛溪有學林老虎文淵鯨之目也

陶凱字中立天台人至正丁亥鄉薦洪武初召修  
元史除翰林應奉文字陞禮部尙書出爲湖廣  
參政致仕復召爲國子祭酒以參政致仕

洪武元年帝旣平定朔方金匱之書悉輸秘府冬十二月詔發所藏元十三朝實錄纂修元史命宋濂王禕爲總裁官徵山林遺逸之士凱與祁門汪克寬德輔金華胡翰仲申餘姚宋元禧无逸臨海陳基敬初休寧趙汴子常新淦曾魯得之淳安徐尊生大年鄞傅恕如心新喻趙壩伯友長洲謝微元懿傳著則明高啓季迪寧波張文海及黃箴王錡凡一十六人相傳龍溪林弼元凱亦與史局然余曾見內閣所儲林登州集其序傳均未言其修史蓋林所修者禮書也至大年詩集有送操琬

公剡還鄱陽作其一云宿德高年史局尊經旬病廢想  
邱園相期麟至方投筆忽報驪歌已在門幽谷便須從  
李愿空齋恨不閉何蕃芝山當戶青如舊笑把青巒入  
酒尊其二云汗牛何啻三千牘奕葉相兼二百年太史  
網羅無軼事諸生縣絕媿新編綠陰晝永毛錐健青瑣  
宵分蠟炬連千里揚帆東匯澤也應回首會丹鉛潛溪  
亦有送琬詩云帝曰元有史是非尙紛揉苟不亟刊修  
何以示悠久宜簡巖穴臣學識當不苟袞斧嚴義例執  
筆來聽受使者行四方持檄盡蒐取非惟收譽髦最欲

尊黃耆子時奉詔來君亦至鍾阜一見雙眼明不啻蒙  
發蔀大啓金匱藏一一共評剖發凡及幽微勝辨白與  
黝奈何君有疾客邪干氣母翩然賦式微使我心中疚  
則琬實與編摩者宋无逸寄潛溪詩云當時十八士去  
畱各有緣所云十八士者公剡居其一矣以先去故未  
得列名也是年秋八月書成丞相宣國公李善長表上  
時克寬汴基元禧輩皆引歸不受爵仕者亦未盡通顯  
惟凱與魯位三九之列二公詩俱罕傳祭酒長歌特雄  
放可喜

曾魯字得之新淦人應召纂修元史編類禮書人  
儀曹爲祠部主事超拜禮部侍郎以病乞歸道

卒有守約齋集

侍郎在史館潛溪稱其補苴罅漏功最多旣爲志墓又  
贊其像云當議禮而考文較損益於錙銖蓋其所長不  
在吟詠也詩藁失傳僅錄其送黃尊師還九宮山一首  
黃尊師者雙井人涪翁八世孫也弱冠以門資襲爵爲  
固始尉患風痺棄官有神師號金花君者曰吾能療汝  
疾愈當爲道士尊師許諾金花君以帛黏其膚燂灼之

靜志居詩話

卷二

三

抄嘉山房

七日而起乃之興國九宮山爲道士主欽天瑞慶宮其  
徒千人太祖西平江漢尊師迎於鄂渚應對稱旨後八  
年召至南京命儀曹設燕享之及還侍郎及潛溪俱送  
以詩潛溪詩曰崔崔九宮山翠蕤倚層青飛觀峙後先  
宸奎爛晶熒中有遡世翁霞衣佩葱珩仙徒一萬指執  
簡聽使今年來遭兵燹散走如流星翁獨牽青牛尋雲  
自躬耕翠華幸江漢扈從森幢旌俯伏黃鶴磯再拜陳  
中情天日下臨照簪裳受餘榮今又奉璽書翩然覲神  
京大官給珍膳法酒雙玉餅祇因逢景運重際泰階平

致使方外士恩寵霑鴻靈一旦賦歸歟行裾逐雲輕自  
言當弱冠綠袍佐山城風露感末疾離家煉黃寧藥烹  
日月鼎符書龍虎經中氣昭象先元覽極窈冥欲期啓  
泥丸狎飛出孩嬰名花滿皇都春風語流鶯景物非不  
饒歸思竟纏縈芳歲去如矢逝波日堪驚純陽一銷鑠  
重陰遂相乘余聞重自媿顛毛類枯莖逐物向役役棲  
身亦煢煢幸有一寸丹能與萬化并何時滴秋露相期  
注黃庭侍郎則賦長歌中間敘尊師本末頗詳山爲真  
牧張真君道靖鍊丹之所故詩有真牧之子世莫儔之



句其事不甚著故具書之

宋禧初名元禧字无逸餘姚人學於楊維禎洪武

初徵修元史有庸菴集

无逸有盛名詩見於選本絕少予購得其集句如欲雪  
未雪雲葉暗似暮非暮風花寒隔河雞犬春聲急繞屋  
田園豆葉肥九歲兒郎能負米半生客路未歸田當時  
未覺青山好此日重來白髮多臘月雨連元日雨故鄉  
人作客居人借人几榻開漁舍送客壺觴出酒家秉燭  
山林連夜宿思家道路幾人歸驚心世事三年後照眼

梅花二月初且復殺雞畱宿客未須采藥入青山空中  
書寄仙人鶴月下詩成佛寺鐘臘雪已消三尺盡春潮  
初送一舟行試看墨本打碑賣勝謁朱門冒雪歸十日  
看山坐西閣一春多雨怕東風惡客不來成好夢大兵  
已過定豐年南山種樹人猶在東閣看花客再來勝地  
江山兵後見高天風雨客邊聞青春誰解看花去白髮  
真成秉燭游身到名山頭已白眼明秋日葉初紅惜春  
幾度行花徑載酒先期過草堂落筆十年身後在懷人  
三絕眼中無梅梁水涸魚龍遠麥隴沙乾鴈鷺稀人日

畫陰開晚照老年寒極愛春風艱難人事都非舊貧賤  
交情倍覺真黃葉又經秋夜雨青鞵曾踏歲寒冰南山  
臘雪新年在東浦春潮昨夜來樹繞石頭知客路巖迴  
谷口見人煙鐘聲曾聽孤舟夜詩卷今題落葉時二月  
江村三日雪百花時序半春陰對法流轉頗饒自然之  
趣其寄景濂學士詩云修史與末役乏才媿羣賢強述  
外國傳荒疎僅成篇則自高麗傳以下悉无逸手筆覽  
元史者所當知也

徐尊生字大年淳安人名修元史授翰林應奉文

字有懷歸橐

大年詩格清老譬諸畫手絕無鉛粉之飾顧諸選家多  
不甄錄何也其懷歸集中有授翰林應奉詩云布衣昨  
日孤寒士翰苑今朝已授官幼有文章淹滯久老無筋  
力遲遲難隨班香案晨簪筆列坐宮門午賜餐早晚歸  
休宜引分免教白髮點金鑾則當日業通籍矣又呈崔  
尚書五古則禮部尚書亮也大年雖自引求去而省臣  
畱之續修庚申君史又編集禮樂書迨三年九月大明  
集禮書成乃始得歸故歸舟詩云兩年畱滯帝王州也

至六年九月詔編日歷復與纂修之列又固辭還山拂  
帝意出爲陝西教授未行而卒蒙叟引睦州志謂曾授  
翰林待制不就誤矣

又云或問大年讀元史詩中語因疏其事於左黃河之  
源元潘學士昂嘗志之柯博士九思序之陶徵士宗儀  
述之世祖至元十七年諭招討使都實佩金虎符以行  
自河州寧河驛度殺馬關約五千里始抵其地越歲乃  
還言河源在土蕃朶甘思西鄙有泉百餘沮洳散渙朶  
若列星以故名火敦腦兒火敦譯言星宿也元史祭祀

志憲宗卽位之二年秋八月始以冕服拜天於日月山  
王禕興龍笙頌序云興龍笙者世祖皇帝所自作其制  
爲管九十列爲十五行每行縱列六管其管下植於匱  
中而置復鼓之以鞀自匱足至管端約高五尺仍鏤版  
作鳳形繪以金采以圍管之三面約廣三尺加文飾焉  
凡大朝會則列諸軒陛之間與衆樂並奏每用樂工二  
人一以按管一以鼓鞀以達氣出聲以叶衆音而樂之  
奏成矣輟耕錄云興隆笙在大明殿下其制植衆管於  
柔韋以象大匏土鼓二韋橐按其管則簧鳴篥首爲二

靜志居詩話

卷二

三

扶荔山房

孔雀笙鳴機動則應而舞凡燕會之日此笙一鳴衆樂皆作笙止樂亦止劈正斧以蒼水玉碾造高二尺有奇廣半之自殷時流傳至今者朝會時一人執之立於陛下酒海之前所以正人不正之意志雅堂雜鈔云宣和殿所藏殷玉鉞長三尺三代之寶也後歸於金元史禮樂志元正受朝皇帝出閣侍儀使引導劈正斧中行至大明殿外劈正斧直正門北向立俟兩宮升御榻劈正斧退立於露階東故趙孟頫宮詞云天步將臨玉斧來葛邏祿迺賢宮詞亦云千官鵠立五雲間玉斧參差擁

畫闌是也一器也而或曰斧或曰鉞按禮有朱干玉戚然則此卽玉戚云爾

案大年讀元史偶書云前朝實錄與修纂異聞可紀不可刪窮河直至星宿海祭天遠在日月山笙名興隆雜鳳吹斧號劈正當龍顏似茲前古殊未有偶吟一二資餘閒

朱右字伯賢臨海人洪武三年召修元史六年修日歷除翰林院編修七年修洪武正韻尋遷晉府長史有白雲橐



元史初成爲期不過六月故極其牽率徐大年詩所云  
草草便垂千載後遲遲難俟百年餘是已李善長表進  
文亦云據十三朝實錄之文成百餘年粗完之史於時  
以順帝三十六年事無實錄可徵未爲完書孝陵復詔  
儀曹分遣呂復張貫歐陽佑黃盅等十二人分行天下  
凡涉史事者令郡國上之又遣儒生危於等歷燕南北  
開局於故國子監采訪文字請行中書官印封識達京  
師三年二月仍命宋濂王禕爲總裁官續完元史纂修  
一十五人右與崇德貝瓊廷琚義烏朱世廉伯清青田

王康希陽嘉定王彝常宗金華張丁孟兼河南高遜志  
士敏江陰張宣藻仲當塗李汝宗茂吳張簡仲簡青城  
杜寅彥正東平李懋暨俞寅殷弼而趙堦伯友仍與其  
列以是年七月竣事其牽率猶如故也獨怪宋王諸公  
負一代重望卽伯賢當日亦以理學文章自命於春秋  
傳國語則有類編於戰國先秦兩漢則有秦漢文衡於  
唐宋則首定韓柳歐陽曾王三蘇文爲八先生文集於  
元則有文穎而又於史則有歷代統紀要覽通鑑綱目  
考證其言曰凡民之欲足而止惟學不可以足而止可

謂有志者矣宜其在局討論精詳用成信史乃任其繁  
蕪重複遂出宋金諸史之下何哉良由孝陵猜忌諸臣  
畏觸逆鱗表進之書不復更其隻字但就庚申君事補  
綴與前編絕不相蒙致有一人而作兩傳者史至此驚  
蛺蝶之不如矣白雲稟凡十卷子僅鈔得前五卷止有  
琴操無詩其後五卷僅得內閣本一過眼恨未鈔成足  
本琴操有郭公葵跋公葵吾鄉人唐處敬詩云我昔居  
秀州友有徐一夔好爲古文章自矜少所推每論其鄉  
人屈指二三希云有善詩者郭姓字公葵不習時所好

刻意追古詞前後數百篇一一皆珠璣郭名秉心惜其詩無一存者可歎也

附錄郭公葵云伯賢廣琴操出人意表非徒擬而作將歸操云九州博大兮將子遂之聖人待天下之心也猗蘭操云子如好修維我之求子如不好于我何郵道在我躬安於命也龜山操云周公上天奈龜山何家國之治否實存乎其人也拘幽操云日月有明容光弗畱輔相之蔽也岐山操云既有吾土毋戕吾民太王之志也履霜操云民生有知以順天賦天下

之爲父子者定矣殘形操云曰修爾躬自天之佑君子惟自修而已琴操作於韓子之後立言尤難其宜與古人並傳哉

張孟兼名丁以字行浦江人徵爲國子學錄與修元史以太常丞出爲山西按察司僉事遷山東按察副使爲吳印所訐論棄市有集

孟兼與景濂同里景濂薦之朝伯溫侍孝陵論一時文人謂宋濂第一其次臣不敢多讓又其次孟兼也然負才傲物屢凌其鄉曲及請假還縣令丞門謁奉牲酒孟

兼坐受其拜不答麾酒却之其亦無禮甚矣當其之官  
山西景濂以文贈行有云鷺鳥之揚揚不如威鳳之雛  
雛獅狔之彊彊不如祥麟之容容刑法之堂堂不如德  
化之雍雍人不務德則已苟有德焉又何檢壬之不革  
其行孟兼盍於此而畱意哉景濂可謂盡朋友相規之  
義矣卒之枯終不悛與吳印爭訐印兩上封事言狀帝  
怒械至闕下命衛士捽髮撻之垂死論棄市詔印曰吾  
除爾害矣善爲之噫印一鍾山寺僧爾帝寵任之授室  
賜金至爲之復讎必期快其意而後已毋乃過與

又云杜子美集有漫興五絕九首又七言云老去詩篇  
渾漫與春來花鳥莫深愁渾漫與者言卽景口占率意  
而作也其後蘇子瞻黃魯直楊廷秀諸公皆襲用之押  
入語韻姜堯章詠蟋蟀詞云幽詩漫興笑籬落呼燈世  
間兒女段復之詞云詩句一春渾漫與紛紛紅紫俱塵  
土陰時夫輯韻府羣玉亦采入語字韻中蓋自元以前  
無有讀作漫興者迨楊廉夫作漫興七首妄謂學杜者  
必先得其情性語言而後可得其情性語言必自其漫  
興始而其弟子吳復見心從而傳會之注云漫興者老

杜在浣花溪之所作也漫興之爲言蓋卽眼前之景以爲漫成之辭其言語似邨而未始不俊此杜體之最難學者自廉夫詩出而世之人遂盡改杜集之舊易與爲興矣首沿其誤者張孟兼也存其詩特糾其謬

王彝字常宗嘉定人以布衣召修元史賜金幣遣還尋薦入翰林以母老乞歸洪武七年坐太守魏觀事伏法有三近齋集

常宗自號媯雌子學有淵源集中孔子廟學碑南門記鄉飲酒銘文甚高潔時鐵崖以文雄東南傾動一世常



宗獨作文妖一篇詆之其略曰天下所謂妖者狐而已矣俄而爲女婦而世之男子惑焉則見其黛綠朱白柔曼傾衍之容無乎不至雖然以爲人也則非人以爲婦女也則非婦女而有室家之道焉此狐之所以妖也文者道之所在曷爲而妖哉浙之西言文者必曰楊先生予觀其文以淫詞譎語裂仁義反名實濁亂先聖之道顧乃柔曼傾衍黛綠朱白奄然以自媚宜乎世之爲男子者之惑之也予故曰會稽楊維禎之文狐也文妖也噫狐之妖至於殺人之身而文之妖往往後生小子羣

趨而競習焉其足爲斯文禍非淺小也文而可妖哉妖  
固非文也世蓋有男子而弗惑者何憂焉誦其文可謂  
獨立不懼者矣其爲詩若神絃四曲露筋孌子篇尙沿  
鐵崖流派而集外有題宋復古鞏洛圖六言云斜陽欲  
雨未雨別嶺歸人幾人峰迴忽見月出穉子相迎澗濱  
頗有摩詰文房遺韻又題宋徽宗畫百合圖云偶爲美  
名圖百合不知南北已瓜分亦有思致

張宣字藻仲初名瑄江陰人洪武初與修元史擢

翰林院編修旣而謫濠道卒有青陽集

藻仲八翰林年未三十孝陵以小秀才呼之既奉詔歸娶邵亨貞女宋學士送之以詩所傳紅錦裁雲春奠鴈紫簫吹月夜乘鸞是也及謫濠道卒以詩辭其父溝南先生端云出世再當爲父子此心終不間幽明誦之使人心惻

張簡字仲簡吳人初師張伯雨爲黃冠元季兵亂以母老歸養遂返巾服洪武初召修元史有白  
羊山樵集

饒介之分守吳中自號醉樵延諸文士作歌仲簡詩擅

塲居首坐贈以黃金一餅高季廸白金三斤楊孟載  
鑑今其詩載集中殊不見好